

Iniziativas, incumbensa e revisiun

La catscha grischuna ei confruntada cun opiniuns fetg divergentas

DA HANS HUONDER / ANR

■ **Duas iniciativas dil pievel, in'incumbensa dil cussegl grond e la proposta dalla renga per la revisiun parziala dalla lescha da catscha. Leutier vegn il meini dils catschadurs ella procedura da consultaziun.**

Las opiniuns dils iniziants e dils catschadurs pertuccont la catscha d'atun ein praticamein diametralas. L'iniziativa encunter la catscha d'atun ei nunvaleivla. A quei conclus ei la dertgira administrativa dil Grischun vegnida dacuort. Quella decisiun acceptan ils iniziants buca. Els tilan quella avon dertgira federala. Sco quei che *Renatus Casutt* di vengnan las preparativas pil recuors terminadas ils proxims dis. Parallelmein marscha il mument la revisiun dalla lescha da catscha ed en connex cun quella vegn era l'iniziativa per «ina catscha etica che secumporta cun la natira» tractada. Las discussiuns e propostas per la revisiun fatschentan era ils catschadurs. Ina gronda maiortad da quels ei encunter ina prolungaziun dalla catscha igl october. Detg cun auters



La catscha d'atun ei dispiteivla dapi ch'ella vegn exequida.

FOTO E. MONN

plaid: Els vulan vinavon ina catscha d'atun duront il november e december sche quei fa da bagesgn. Ella davosa ediziun dil «Catschadur grischun» tematiescha il president dall'Uniun can-

tunala dils catschadurs da patenta, *Robert Brunold* da Sursaissa, quella damonda. El ei dil meini che la fracziun dils catschadurs el cussegl grond sappi esser decisi-va en quei connex. Tenor Bru-

nold fuss ei prudent da referer la revisiun parziala ch'ei necessaria era sin fundament d'ina incumbensa da deputadas e deputaus.

Ils meinis van lunsch in ord l'auter

Il proxim temps ha era la dertgira federala da sefatschentar dalla catscha grischuna

DA HANS HUONDER / ANR

■ **Ils iniziants dall'iniziativa encunter la catscha d'atun acceptan buca la decisiun dalla dertgira administrativa e recuoran avon dertgira federala. Quella ha susteniu la regenza ed il cussegl grond ed annullau l'iniziativa. Aschia vegn igl urari concernent la revisiun parziala dalla lescha da catscha ellas stretgas.** Il cantun Grischun ei pertucaus il mument gest da duas iniziativas dil pievel che pertuccan la catscha. Ina ei quella che pretenda in scamond dalla catscha d'atun. Il cussegl grond ha annullau ella e survegniu sustegn per sia decisiun dalla dertgira administrativa. Quella decisiun acceptan ils iniziants buca. «Nus essan lundervi da semtgar il recuors», di *Renatus Casutt*. Ils iniziants ein vinavon dil meini che quella iniziativa stoppi avon il pievel. «Ins sa semplamein buc ignorar il meini da varga 10 000 persunas e far valer per gronda part motivs forestals. Nus havein buca dau si la speranza», di Casutt. La sonda vargada ein ils iniziants sescuntra per far las davosas preparativas pil recuors alla dertgira federala. Quel vegn danovamein preparaus da lur giurist *Michael Kneller*. Pendent ei era l'iniziativa per «ina catscha etica che secumporta cun la natira». Quella duei vegnir tractada igl october dil cussegl grond parallelmein cun la revisiun parziala dalla lescha da catscha. En quella revisiun vegnan entgins puncts da lezza iniziativa risguardai. La gronda part dall'iniziativa taxescha la regenza medemamein per nunvaleivla.

Co vinavon?

Sin fundament dil recuors tier la dertgira federala vegn igl urari per la revisiun parziala dalla lescha da catscha mess en damonda. Davart la regenza ei quei gia ve-



Alla catscha d'atun vegnan oravontut vadials, stiarlas e vaccas-tscharva sittai. Damai ch'igl ei scumadai da sittar vaccas lactontas e vadials il settember po il plan da catscha vegnir contonschius sulettamein cun ina catscha il november e december. FOTO H. HUONDER

gniu signalisau sunter la decisiun dalla dertgira administrativa: «En cass ch'ils iniziants recuoran tier la dertgira federala eis ei necessari da reponderar il plan da terminis. Igl ei aunc buca decidiu schebein la revisiun dalla lescha e l'iniziativa per 'ina catscha etica che secumporta cun la natira' vegnan refieras e tractadas pli tard», di cusseglier guvernativ *Mario Cavigelli*, cau dil departament da construcziun, traffic e selvicultura sin damonda dall'Agentura da novitads rumantscha. La decisiun ei els mauns dalla conferenza

dils caus da fracziun ensem cun il president dil cussegl grond. Tenor Mario Cavigelli eis ei necessari da sparter las iniziativas dalla revisiun parziala dalla lescha: «Ella revisiun ademplin nus denter auter ina incumbensa da deputadas e deputaus che pretenda ina reavertura dalla catsch'aulta durant quater dis ella secunda mesadad digl october.» Schebein quell'incumbensa vegn tonaton manteneda ei in'ulteriura damonda sunter che la basa dils catschadurs ei s'exprimida claramain encunter quella reavertura. Dau

d'entellir da sustener il meini dils catschadurs ha denter auter il vicepresidente dall'uniun cantunala *Christian Kasper* ch'ei era president dalla fracziun dils catschadurs el cussegl grond. El era dil reminent staus il fevrer vargau il premsignader dall'incumbensa alla regenza per quella reavertura dalla catscha igl october. La finamira dalla regenza era da tractar la revisiun sco era l'iniziativa per «ina catscha etica che secumporta cun la natira» igl october vegnent. Parallelmein sper las duas iniziativas han las commembras ed

ils commembers dall'Uniun cantunala dils catschadurs da patenta dil Grischun priu posiziun enviers la revisiun parziala dalla lescha da catscha. Ina gronda maioritad dils catschadurs ei encunter ina reavertura dalla catsch'aulta ella secunda mesadad digl october sco proponiu el sboz dalla revisiun. Els prefereschin vinavon ina catscha d'atun durant il november e december sche quei ei necessari sin fundament dil grond diember da tscharvas.

Reponderar la situaziun

Il cumpromiss – sch'ins vul dir aschia – per anflar in consens meina uss en ina situaziun extraordinaria. «Ils commembers dall'Uniun cantunala dils catschadurs da patenta sedamondan ussa tgei che succeda cun la proposta per la reavertura dalla catsch'aulta igl october sunter ch'els dian claramain na a quella», scriva il president dall'uniun cantunala, Robert Brunold, ella davosa ediziun dil «Catschadur grischun». Tenor el sa igl agir dalla fracziun dils catschadurs el cussegl grond esser da muntada en quei connex. «Nossa incumbensa ei clara: Nus stuein s'engaschar encunter la catscha digl october. Ei fuss denton falliu da schar curdar la revisiun parziala dalla lescha per quei motiv», puntuescha Brunold. Sin fundament da quella situaziun propona el da far in paus e da referer la tractaziun dalla revisiun: «Lu essan nus era segirs ch'ei vegn priu negins conclus tut alla bahuta.» Che la catscha resta vinavon in tema per la publicitad muossa dil reminent in'ulteriura iniziativa ch'ei sin rucca. L'organisasiun «Wild beim Wild» rimna numnadamein suttascripziuns per in'iniziativa critica enviers la catscha. La finamira da quella ei dapli protecziun digl ambient e dils animals tenor igl expempel dil cantun Geneva: Survigiladers da catscha enstagl catschadurs.